



## Հովհաննէս Հովհաննիսյան

### Արագն եկավ լափին տալով . . .

Արագն եկավ լափին տալով,  
Ժեռ քարերին, ափին տալով .  
Ո՞րտեղ թաղեմ ես իմ դարդը,  
Չոր գլուխս տափին տալով:

Ա՛յ իմ Արագ, ջուրըդ վարար,  
Միրուն յարիս յարաբ տեսա՞ր .  
Ես չըհասա իմ մուրագին,—  
Արա՛գ, յարաբ կարոտս առա՞ր:

Ամպերն եկան Մասիս սարին,  
Կարոտ մնացի ես իմ յարին .  
Աստո՞ծ սիրես, Էրված սրտիս  
Ջուղաբ բերես եկող տարին:

Գիշերն անքուն գիր կըգրեմ .  
Արտասունքս գետ կըշինեմ .  
Արա՛գ, ծեգը ջրիդ չառած՝  
Իմ սև դարդը քեզ կըբերեմ:

Կասես՝ շողքը քարին ընկավ,  
Կըրակըն իմ սրտին ընկավ .  
Կամար ունքից, թուխ աչքիցը

Ցավն իմ ջիվան ջանին ընկավ:

Արագն եկավ լափին տալով,  
Ժեռ քարերին, ափին տալով .  
Ո՞րտեղ թաղեմ ես իմ դարդը,  
Չոր գլուխս տափին տալով . . .